

Headlines

- प्रधानमंत्री नरेन्द्र मोदी होरें आखेआ ऐ जे देशा गी विकास ते विरासत दौनें गी कन्नै लेइयै अगगे बधना लोड़चदा ऐ। उनें मुख्य गी औपनिवेशिक मानसिकता थमां मुक्त करने पर बी चेचा जोर दित्ता।
- मुख्यमंत्री उमर अब्दुल्ला होरें श्रीनगर च मिशन युवा दी शुरुआत कीती ते गलाया जे इस महत्वपूर्ण गैह करी नोजवानें दा सशक्तिकरण होग ते आत्म निर्भर अर्थबवस्था दा निर्माण होग।
- उधमपुर जिले दे बसंतगढ़ आहले घने जांगली इलाके च छप्पे दे जैशे मोहम्मद गुट दे त्रै पाकिस्तानी आतंकवादिएं दे सफाये लेई सुरक्षाबलें दा अभियान अज्ज उप्परोतली त्रीये ध्याड़े बी जारी ऐ।
- अमले, सार्वजनिक शकैतें, कानून ते न्याऽ बारै खडेरी गेदी संसद दी स्थाई कमेटी दे इक डेलीगेशनै अज्ज श्री माता वैष्णो देवी जी दे पवित्तर दरबार च मत्था टेकेआ।
- जम्मू कश्मीर दे 5 अकांक्षी ब्लाकें भारत दे शीर्ष 15 अकांक्षी ब्लाकें च अपनी थाहर पक्की कीती ऐ।

<><><><><><>

PM Heritage (byte)

प्रधानमंत्री नरेन्द्र मोदी होरें आखेआ ऐ भारत अपने बचारें, दर्शन ते ज्ञान दी वजह करी गै ज्हारें ब'रें थमां शाश्वत बने दा ऐ। अज्ज नमीं दिल्ली च मन्ने-परमन्ने दे जैन संत आचार्य विद्यानंद जी महाराज हुं'दी 100मीं जयंती आले समारोह दा उद्घाटन करदे होई श्री मोदी होरें आखेआ जे भारत, इस दुनिया दी सभ्बनें शा प्राचीन जीवंत सभ्यता ऐ ते इस शाश्वत दर्शन दा स्रोत, देशै दे ऋषी, संत ते आचार्य न। श्री मोदी होरें आखेआ जे देशै गी विकास ते विरासत, दौनें गी कन्नै लेइयै अगगे बधना लोड़चदा ऐ। उ'नें आखेआ जे इससै संकल्प गी ध्याना च रक्खदे होई केंद्र सरकार, देशै दिएं सांस्कृतिक धरोहरें ते तीर्थ स्थलें दा बी विकास करा'रदी ऐ। उ'नें देशै गी औपनिवेशिक मानसिकता थमां मुक्त करने पर बी चेचा जोर दित्ता। प्रधानमंत्री होरें आखेआ

<><><><><><>

Mission Yuva(byte)

केन्द्र शासित प्रदेश जम्मू कश्मीर दे नोजवानें दे सशक्तिकरण ते बाद्ध रोजगार दे मौके मुहैया कराने दी बत्ता इक होर महत्व आली गैह पुट्टदे होई मुख्यमंत्री उमर अब्दुल्ला होरें SKICC श्रीनगर च युवा उद्यमी विकास अभियान मिशन युवा दा वर्चुअल ढंगा कन्नै शुरुआत कीती जेह्दे च ज्हारें दी गिनतरी च नोजवानें हिस्सा लैता। एह्दे राएं नोजवानें दा सशक्तिकरण होग ते आत्मनिर्भर बनी सकगन। इक सोशल मीडिया पोस्ट च मुख्यमंत्री हुंदे कार्यालय दी ट्वीट मूजब मुख्यमंत्री होरें अज्ज मिशन युवा दी शुरुआत कीती जेह्डी 5 ब'रे च जम्मू कश्मीर दे नोजवानें लेई सवा चार लक्ख नौकरिएं ते 1.37 लक्ख उद्यमों दी पैदावार च मदाद करोग। सेहत मंत्री सकीना इत्तू होरें इस प्रोग्राम दी शुरुआत मगरा मीडिया कन्नै गल्ल करदे होई आखेआ

<><><><><><>

Search Operation

उधमपुर जिले दे बसंतगढ़ आहले घने जांगली इलाके च छप्पे दे जैशे मोहम्मद गुट दे त्रै पाकिस्तानी आतंकवादिएं दे सफाये लेई सुरक्षाबलें दा अभियान अज्ज उप्परोतली त्रीये ध्याड़े बी जारी ऐ ते एह्दे लेई सुरक्षाबलें आसेआ लगातार ब्हाई निगरानी बी कीती जा'रदी ऐ। सुरक्षाबलें दी सांझी टीम नै इस पूरे इलाके दी खरी चाल्ली घेराबंदी करी रक्खी दी ऐ। ध्यानजोग ऐ जे जंदे वीरवारें होए दे टाक्करे च सुरक्षाबलें जैशे मोहम्मद दे इक पाकिस्तानी आतंकवादी गी मारी-मुकाया हा जिसलै के ओह्दे त्रै होर साथी बसंतगढ़ आहले जांगली इलाके च जाई छप्पे हे। सुरक्षाबलें अपनी घेराबंदी होर तगडी करदे होई अज्ज बड़डलै फही ड्रोन ते खोजी कुत्तें दी मदाद कन्नै अपने अभियान गी अगगे बधाया। इ'नें पाकिस्तानी आतंकवादिएं दे सफाये लेई बाददू नफरी गी उत्थे भेजी दित्ता गेदा ऐ।

<><><><><><>

Lakhanpur SANJY (byte)

श्री अमरनाथ जी की सलाना जाततरा गी शुरु होने च हून बस किश गै ध्याड़े बाकी न ते एहदे मददेनजर सरकारै, सम्मने बंदोबस्ते गी मुक्कदा रूप देई दित्ता ऐ। जम्मू-कश्मीर दा प्रवेश-द्वार मन्नेआ जाने आह्ला लखनपुर, श्री अमनाथ श्रद्धालुएं दे सोआगत लेई पूरी चाल्ली तैयार ऐ। उत्थे सैलानिएं लेई इक शानदार सोआगती केन्द्र खडेरें गेदा ऐ जेहड़ा बक्ख-बक्ख चाल्ली दिएं सुविधाएं कन्नै लैस ऐ। इस केन्द्र गी मता आकर्षक बनाने लेई एहदिएं कंधें उप्पर शानदार चित्तरकारी कीती गेदी ऐ जेहदे च कश्मीर घाटी की खूबसूरती, बर्फीले फाड़, सैल्ले मैदान ते श्री अमरनाथ जी की पवित्र गुफा गी दर्शाया गेदा ऐ। मुंसिपल कमिटी लखनपुर दे मुख कार्जकारी अधिकारी एस.आर. सांगड़ा होरें आखेआ ऐ जे सोआगती केन्द्र दिएं कंधें पर कीती गेदी एह चित्तरकारी, श्रद्धालुएं गी आकर्षत करोग। उ'नें अग्वे आखेआ

<><><><><><>

Mann Ki Baat

प्रधानमंत्री नरेन्द्र मोदी होर कल ऐतवारें 29 जून गी अपने माहवार रेडियो कार्यक्रम "मन की बात" दे राएं देश-बदेश च रौह्ने आहले लोकें कन्नै अपने बचार सांझे करडन। एह इस कार्यक्रम की 123मीं किशत होग जेहदा प्रसारण आकाशवाणी ते दूरदर्शन दे समूलचे नेटवर्क दे कन्नो-कन्नी आकाशवाणी खबरें की वेबसाइट ते न्यूज ऑन ए.आई.आर मोबाइल ऐप ते डीडी न्यूज, आकाशवाणी न्यूज, प्रधानमंत्री हुंदे दफतर ते सूचना ते प्रसारण मंत्रालय दे यूट्यूब चैनलें पर बी कीता जाहग। आकाशवाणी जम्मू आसेआ मन की बात दे तुरत मगरा एहदा डोगरी च अनुवाद प्रसारत कीता जाहग जिसी तुस रातीं 8 बजे इक बारी परतियै बी सुनी सकदे ओ। आकाशवाणी दा क्षेत्रीय समाचार एकांश जम्मू कल रातीं साङ्ढे 10 बजे मन की बात पर इक बशेश परिचर्चा बी प्रसारत करोग।

<><><><><><>

Parl Standing Comm (byte)

अमले, सार्वजनिक शकैतें, कानून ते न्यास बारै खडेरें गेदी संसद की स्थाई कमिटी दे इक डेलीगेशनै अपने प्रधान ते संसद सदस्य ब्रिज लाल हुं'दी अगुवाई च अज्ज श्री माता वैष्णो देवी जी दे पवित्र दरबार च मत्था टेकेआ। कमिटी नै एह दौरा, खित्ते च सार्वजनिक सेवा ते न्यास उपलब्ध करोआने आहले महत्वपूर्ण इदारें दे कम्मकाज दा आंकलन करने मतल्लक अपने अध्ययन दौरे दे इक हिस्से दे तौर उप्पर लाया ऐ। इस दरान कमिटी दे सदस्यें माता वैष्णो देवी जी की गुफा च मत्था टेकेआ ते श्री माता वैष्णो देवी श्राईन बोर्ड आसेआ श्रद्धालुएं गी उपलब्ध करोआई जा'रदी सुविधाएं की समीक्षा बी कीती। डेलीगेशनै, श्राईन बोर्ड दे जतनें की खरी मती सराहना कीती। इस सरबंघै च मीडिया कन्नै गल्लबात करदे होई कमिटी दे प्रधान ब्रिज लाल होरें आखेआ

<><><><><><>

ABP

भारत सरकार दे विकास की तांग आले अकांक्षी ब्लाक प्रोग्राम एबीपी तैहत इक महत्वपूर्ण उपलब्धि हासल करदे होई केन्द्र शासत प्रदेश जम्मू कश्मीर दे 5एं ब्लाकें पूरे देश दे तकरीबन 500 अकांक्षी ब्लाकें शा शीर्ष 15 च अपनी थाहर हासल कीती ऐ। एहदे कन्नै एह साफ होई जंदा ऐ जे केन्द्र शासत प्रदेश नै जमीनी स्तर उप्पर इस दिशा च सकारात्मक विकास हासल कीता ऐ। पुलवामा दे इचे-गोला ब्लाक नै दूई थाहर हासल कीती जदके बांदीपोरा दे तुलैल ब्लाक दे 8मीं थाहर हासल कीती। इसै चाल्ली पुंछ दे मनकोट ब्लाक नै नौमीं, कुपवाड़ा की केरन ब्लाक नै 10मीं ते रियासी दे ठाकराकोट ब्लाक गी 13मीं थाहर हासल कीती ऐ।

<><><><><><>

Rajouri(byte)

राजौरी जिले दे सक्री ग्रां च गैस्ट्रो एंट्रीटिस प्रकोप मगरा 18 लोकें गी राजौरी दे गौरमेंट मैडिकल कालेज च भर्ती कराया गेआ ऐ ते दर्जनें मरीजें दा इलाज ग्रां च गै मोबाइल मैडिकल टीम आस्सेआ उपचार कीता जा'रदा ऐ। इंदे शा दऊं मरीजें गी जीएमसी जम्मू रैफर कीता गेआ ऐ ते 1 मरीज दा अजें बी इलाज जीएमसी एसोसिएटिड अस्पताल च चला'रदा ऐ। सेहत विभाग नै इसी पानी दे प्रदूषण सरबंधी बमारी दस्सेआ ऐ। साढ़े समाचार कक्ष कन्नै गल्ल करदे होई राजौरी दे सीएमओ डॉ. मनोहर लाल गुप्ता होरें आखेआ

<><><><><><>

Weather

ते हून खबर मौसम दी। मौसम विभाग आसेआ दित्ती गेदी जानकारी मूजब जम्मू संभाग दे केई सारे हिस्सें च हौली थमां दरम्याने दर्जे दी बरखा ते गरज—चमक कन्नै बरखा बरने दी मेद ऐ जिसलै के कश्मीर घाटी दिएं बी किश थाहरें पर हौली बरखा बरने दे असार न। मौसम विभाग मूजब, इस दरान टामीं—टामीं थाहरें उपपर 30 शा 40 किलोमीटर प्रति घेंटे दी रफ्तार कन्नै तेज हवां चली सकदि'आं न। विभाग नै आखेआ ऐ जे औंदी 3 जुलाई तगर राई—बाई सरबंधी गतिविधिएं गी सुरक्षित ढंग'नै फही शुरु होई सकदिआं न। उ'आं इस दरान हौली बरखा जां गरज—चमक कन्नै बरखा बरने दी संभावना थमां इन्कार नेई कीता जाई सकदा इस करियै करसानें गी सलाह दित्ती गेई ऐ जे ओह पूरी एहतियात दे कन्नै गै राई—बाई आहली गतिविधिएं गी अंजाम देन। इस सरबंधै च होर जानकारी सांझी करदे होई रामबाग श्रीनगर थमां मौसम विभाग दे अधिकारी ब्रह्म पाल होरें आखेआ

<><><><><><>